

खबरां

- राष्ट्रपति द्रोपदी मुर्मू होरें अज्ज राष्ट्रपति भवन च आयोजित रक्षा आलंकरण समारोह च रक्षा ते सुरक्षा कर्मिं गी उंदी बहादुरी लेई सम्मानित कीता।
- प्रधानमंत्री नरेंद्र मोदी हुं'दा त्र'ऊं दिनें दा सेशल्स दौरा मुकम्मल। प्रधानमंत्री मोदी सेशल्स दे सब्भनें शा बड्डे नागरिक सम्मान गार्ड आफ द ब्लू हारीजन कन्नै सम्मानित।
- हरियाणा ते राजस्थान सरकारें अज्ज नमीं दिल्ली च यमुना जल परियोजना निर्माण सरबन्धी इक समझौते पर दस्तखत कीते न जेदे नै दौनें राज्यें बश्कार पानी गी लेइयै चलदी अवा'रदी समस्या दा नबेडा होई जाह्ग।
- सुप्रीम कोर्ट नै श्रीराम जन्मभूमि तीर्थ क्षेत्र ट्रस्ट आसेआ मंदरै दी चढतल च कथित गड़बड़ी आहले मामले च तुरत सुनवाई करने दी याचिका खारज करी दिती ऐ।
- भारत नै उनें खबरें दा खंडन कीता ऐ जिंदे च दावा कीता जा'रदा ऐ कि श्रीलंका च आयोजित सुरक्षा सम्मेलन दुरान भारत ते पाकिस्तान बश्कार गल्लबात होई ऐ।
- वेनेजुएला दे भूंचाल प्रभावित इलाकें च आप्रेशन अनिस्ताद तैहत भारती फौज दा फील्ड अस्पताल 24 घंटे मुफ्त इलाज दियां सुविधां प्रदान करा'रदा ऐ।
- राज्यसभा लेई नमें चनोए दे 8 मित्बरें गी अज्ज सगंध चकाई गेई।
- फीफा विश्व कप 2026 च दिलचस्प नाकआउट दौरा जारी, कनाडा दक्खन अफ्रीका गी हराइयै पैहली बारी प्री क्वार्टरफाइनल च पुज्जा, अज्ज रातीं ब्राजील ते जपान बश्कार नाकआउट मकाबला।

<><><><><><>

Prez. Awards

राष्ट्रपति द्रोपदी मुर्मू होरें अज्ज राष्ट्रपति भवन च आयोजित रक्षा आलंकरण समारोह च अज्ज रक्षा ते सुरक्षा कर्मिं गी उंदी बहादुरी लेई सम्मानित कीता। समारोह दे पैहले गेड च 8 जून गी 51 कर्मिं गी सम्मानित कीता गेआ हा जिंदे च 7 कीर्ति त्र, 15 वीर चक्र ते 29 शौर्य चक्र भेंट कीते गे हे। अज्ज सम्मान हासल करने आहलें च एयर मार्शल तरूण चौधरी, लेफ्टिनेंट जनरल वाष्णेय लेफ्टिनेंट जलरन विकास रोहेला, लेफ्टिनेंट जनरल हरबिंदर सिंह वंद्रा ते लेफ्टिनेंट जनरल मोहिंदर पाल सिंह शामिल न जिनेंगी अति विशिष्ट सेवा पदक कन्नै सम्मानित कीता गेआ। इस मौके पर उपराष्ट्रपति सी.पी राधाकृष्णन, रक्षामंत्री राजनाथ सिंह ते केई केंद्री मंत्री ते थेआरबंद बलें दे बड्डे अफसर बी मजूद हे।

<><><><><><>

Modi-Schelles

प्रधानमंत्री नरेंद्र मोदी होरें 3 दिनें दा अपना सेशल्स दौरा मुकम्मल करी लैता ऐ। इस दौरे दुरान सेशल्स दे राश्ट्रपति डा. पैट्रिक हर्मिनी होरें उनेंगी पर्यावरण संरक्षण ते सतत विकास लेई उत्थूं दे सम्भनें शा बड्डे नागरिक सम्मान गार्डियन आफ द ब्लू होराइजन कन्नै सम्मानित कीता। दौरे दुरान प्रधानमंत्री सेशल्स दी आजादी दे 50एं बरें दे समारोह च शामिल होए। इस दुरानदौनें मुख्यें बशकार 9 महत्वपूर्ण समझौते पर बी दस्तखत होए न। भारत नै सेशल्स दे विकास कम्में लेई 1 जहार 250 करोड़ रुपे दी लाइन आफ क्रेडिट माली मदद दे रूपै च देने दी बी घोशणा कीती।

<><><><><><>

Shah Water Meet

हरियाणा ते राजस्थान सरकारें अज्ज नमीं दिल्ली च यमुना जल परियोजना दे निर्माण ते इसी चालू करने सरबन्धी इक समझौते पर दस्तखत कीते न। गृह मंत्री अमित शाह होरें इस मौके पर आखेआ कि इस समझौते कन्नै हरियाणा ते राजस्थान दे लोकें दी कोई त्रै दहाकें थमां चलदी आवा'रदी पानी दी समस्या दा नबेड़ा होई गेआ ऐ। उनें आखेआ कि एहू समझौता प्रधानमंत्री नरेंद्र मोदी हुंदे आसेआ कीती गेदी गल्लबात दे राएं नबेड़ा करने दी इक शानदार मसाल ऐ। उनें आखेआ कि इस समझौते दे तैहत जुलाई कोला लेइयै अक्तूबर तगर जमना नैहर राएं राजस्थान गी त्रै पाइपलाइनें राएं 58 करोड़ क्यूबिक मीटर पानी दी सप्लाई कीती जाहगा। जिमी हेठा गुजरने आहली इनें पाइपलाइनें कन्नै दौनें राज्यें गी पीने आहला पानी सखल्ले उपलब्ध होई सकगा। इससै दुरान जल शक्ति मंत्री सी आर.पाटिल होरें आखेआ कि समझौते दे तैळत मानसून दुरान राजस्थान दे हिस्से दा पानी पाइपलाइन राएं हथनीकुंड बराज थमां उपलब्ध कराया जाहगा ते एहदे नै चुरू, सीकर, झुंझुन ते राजस्थान दे होरनें इलाकें जित्थे पानी दी मती कमी रौहंदी ऐ, उत्थे पीने आहले पानी दी समस्या दूर होई जाहगा।

<><><><><><>

LG- Pratham Puja

उपराज्यपाल मनोज सिन्हा होरें अज्ज श्री अमरनाथ जी दी पवित्तर गुफा च प्रथम पूजन कीता। इस मौके उपपर उ'नें रमानदारी ते खुशहाली सने सबनें लेई खरी सेहत ते कल्याण दी कामना कीती। मगरा पत्रकारें कन्नै गल्लबात करदे होई श्री सिन्हा होरें आखेआ जे औंदी 3 जुलाई थमां जात्तरा विधिवत तरीके कन्नै शुरु होग ते एहदे मद्देनजर प्रशासन, श्री अमरनाथ जी श्राइन बोर्ड, फौज, पुलिस, सुरक्षाबलें, मुकामी समुदायें, सेवा प्रदान करने आहलें ते स्वयंसेविएं आसेआ पूरी तालमेल दे कन्नै कम्म तोड़ चाढ़े जा करदे न। उ'नें आखेआ जे सबबै सरबन्धत धड़े, श्री अमरनाथ जी दी जात्तरा गी बवस्थित ते सुरक्षित ढंगै'नै करोआने लेई अनथक जत्त करा'रदे न। श्री सिन्हा होरें आखेआ जे जम्मू-कश्मीर, इस धार्मिक ते आध्यात्मिक जात्तरा लेई श्रद्धालुएं दे सुआगत गितै पूरी चाल्ली तैयार ऐ।

<><><><><><>

SC-PIL

सुप्रीम कोर्ट नै श्रीराम जन्म भूमिका तीर्थ क्षेत्र ट्रस्ट आसेआ मंदरै दी चढतल च कथित तौरा पर चोरी ते गड़बड़ी आहले मामले च तुरत सुनवाई लेई दाखल इक जनहित याचिका गी खारज करी दित्ता ऐ।

जजें दी विशेश पीठै पुच्छेआ जे इस मामले दी सुनवाई करने दी इन्नी काहली केहू ऐ कीजे अदालतै च सोए दियां छुट्टियां न ते जिसलै अदालतां खुलदियां न तां इंदी सुनवाई बारीसिर होई जाहगा। तोआई, पुलसै इस मामले दी जांच दा दायरा बधांदे होई मंदर प्रशासन ते चढतल दी गिनतरी कन्नै जुडे दे कोई 700-80 मुश्तवा लोकें कोला पुच्छ-गिच्छ लेई नोटस जारी कीता ऐ। मामले च गिरफ्तार कीते गेदे सब्भनें 5 आरोपिएं दी न्यायिक हिरासत दी मयाद अज्ज खत्म होआ'रदी ऐ ते पुलस इस करियै इंदी अगगे दी हिरासत ते पुच्छ-गिच्छ दी तैयारी च ऐ।

<><><><><><>

Misri India Pak

विदेश सचिव विक्रम मिस्त्री होरें उनें खबरें दा खंडन कीता ऐ जिंदे च एहू दावा कीता गेआ जे श्रीलंका च आयोजित सुरक्षा सम्मेलन दरान भारत ते पाकिस्तान मझाटै दुए गेड दी गल्लबात होई। एह्दे सरबन्धत खबरें पर मिस्त्री होरें आखेआ जे इस चाल्ली दी गल्ल कोई नमीं नेई ऐ ते नां गै भारत सरकार इसी मानता दिंदी ऐ। विदेश सचिव होरें आखेआ जे रेहा सोआल भारत सरकार दा, इस चाल्ली दे आयोजनें च भारत दी कोई आधिकारिक भागीदारी या समर्थन नेई ऐ।

<><><><><><>

Rajnath-DRDO

रक्षा मंत्री राजनाथ सिंह होरें अज्ज नमीं दिल्ली च डीआरडीओ गी माली शक्तियें सरबन्धी इखतेयार डीएफपी-2026 जारी कीता। रणनीतिक अनुसंधान ते विकास परियोजनाएं दी दक्षता जवाबदेही ते समेबद्ध अमलावरी दी दिशा च एहू इक्क महत्वपूर्ण सुधार ऐ। इस मौके पर राजनाथ सिंह होरें आखेआ जे डीएफपी-2026 अनुसंधान ते विकास पारिस्थीतिकी तंत्र सोयां उभरने आहली प्रणालियें प्लेटफार्मे ते प्रौद्यगकियें दे तेजिया कन्नै उत्पादन ते रक्षा बलें च उंदे समावेश गी सखल्ला बनाग। रक्षा मंत्री होरें आखेआ जे एह्दे कन्नै उद्योग ते शिक्षा जगत कन्नै सहयोग मजबूत होग।

<><><><><><>

PM-Fin. Advisor

प्रधानमंत्री नरेंद्र मोदी होरें आखेआ ऐ कि कुल संसारी सतह पर कठन ते चनौती भरै दौर च बी भारत नै सरंचनात्मक दिक्कतें-कमजोरिएं दे बावजूद बी जेह्डी स्थिरता दा प्रदर्शन कीता ओहू सराहनेजोग ऐ। भारत दे मुख् आर्थिक सलाहकार डा. वी अनंत नागेश्वन हुंदे आसेआ लिखे दे इक लेख गी सांझा करदे होई मोदी होरें आखेआ कि एहू उपलब्धि इक दहाके थमां जारी व्यापक आर्थिक स्थिरता ते नीति निर्माण गी जवाबदेह ते लचीला बनाई रखने दा नताजा ऐ। प्रधानमंत्री मोदी होरें आखेआ कि देश दी सुरक्षा ते विकास लेई एहू बड़ा जरूरी ऐ कि आत्म निर्भरता दा एहू सफर इसै चाल्ली जारी रवै ते सरकार आत्मनिर्भरता दी प्रक्रिया गी तेजिया न्नै अगडे बधाने लेई पूरी चाल्ली बचनबद्ध ऐ।

<><><><><><>

Medical Equip Scheme

बाहरले मुख् थमां आयात पर निर्भरता गी घट्ट करने, नवाचार गी समर्थन देने ते मुख् अंदर निर्माण गी बढ़ावा देने दे मकसद कन्नै सरकार केई हीले करै करदी ऐ। इनें हीलें दे हिस्से दे तौरा पर मेडिकल उपकरणें दे निर्माण सरबन्धी उद्योगें गी मजबूती देने लेई इच्छुक संस्थानें थमां दरखास्तां मंगियां



< < < < < <

पेट्रोलियम ते कुदरती गैस सरबन्धी मंत्री हरदीप सिंह पुरी होरें आखेआ ऐ कि प्रधानमंत्री नरेंद्र मोदी हुंदी अगुवाई च भारत नै उर्जा उपभोक्ताएं गी हर चाल्ली दे माड़े असर कोला बचाया ऐ जिसलै कि पूरी दुनिया गी गंभीर उर्जा संकटें दा सामना करना पवा'रदा ऐ ते ईंधन दी सप्लाई बुरी चाल्ली प्रभावित होआ करदी ऐ। अपने इक लेख च इस बारै विचार सांझे करदे होई पुरी होरें आखेआ कि भारत च तेल पेट्रोल दा सुद्धा भंडार मौजूद ऐ, पंप चालू न, गैस लोकेँ गी थोआ करदी ऐ ते कुसै चाल्ली दी कोई दिक्कत-परेशानी नेई ऐ। दुनिया भरै च फैले दे इस संकट दे बावजूद बी भारती उपभोक्ता गी दुनिया दे होरनें मूलखें दे मकाबले ईंधन लेई घट्र भुगतान करना पेआ ऐ। हरदीप पुरी

होरेन अपने लेख च लिखेआ ऐ कि संकट दरान देसैदी कच्चे तेल दी सप्लाई श्रृंखला 27 मुल्लेन थमां बधियै 31 होई गेई ऐ, आयात टर्मिनल दूने होई गेदे न ते मोदी हुंदी अगुवाई च इक दहाके च बछाई गेदिं पाइप लाइनें ते भंडारें, राएं सप्लाई विजन त्रोडे दे जारी रेही।

<><><><><><>

Delhi-EV

दिल्ली मंत्रिमंडल नै अज्ज दिल्ली इलेक्ट्रिक गड्डियें सरबन्धी नीति गी मंजूरी देई दिती ऐ। इसी पैहली जुलाई सवां चरणबद्ध तरीके कन्नै शुरू कीता जाह्ग। इस नीति दे तैहत राश्ट्री राजधानी गी 31 मार्च 2030 तगर पूरी चाल्ली शून्य उत्सर्जन परिवहन बक्खी लेई जाने आस्तै 15 ज्हार करोड़ रपे दा माली आवंटन कीता गेआ ऐ। नमीं दिल्ली च इक संवाददाता सम्मेलन गी संबोधित करदे होई दिल्ली दियां मुखमंत्री रेखा गुप्ता होरेन आखेआ जे एह नीति पूरी चाल्ली कन्नै इलेक्ट्रिक गड्डियें पर केंद्रित ऐ। एहदा अखीरला लक्ष्य दिल्ली गी बल्ले-बल्ले प्रदूषण थमां मुक्त शैहरै च तब्दील करना ऐ जेहदे कन्नै उत्थूं दे बसनीकें गी लाह हासल होग। उनें आखेआ जे सरकार नै अगले 4 बरें च इसी चरण बद्ध तरीके कन्नै लागू करने लेई इक व्यापक योजना तैयार कीती ऐ।

<><><><><><>

FIFA

फीफा विश्व कप-2026 नाकआउट दे दिलचस्प दौर च पुज्जी गेदा ऐ। इक जबरदस्त मकाबले च कनाडा नै दक्खन अफ्रीका गी 1-0 कन्नै हराइयै पैहली बारी राउंड आफ 16 च प्रवेश करी लैता ऐ। नाकआउट गेड च अज्ज ब्राजील, जर्मनी ते नीदरलैंड्स ज्नेइएं दिग्गज टीमें दे बड्डे मकाबले होआ करदे न। कनाडा पैहली बारी फुटबाल विश्व कप दे प्री-क्वार्टर फाइनल च खेडग। एह मैच शनिवारें 4 जुलाई गी होग। अज्ज राती साड्डे 10 बजे ब्राजील दा मुकाबला जपान कन्नै होग।

<><><><><><>